



PROGETU IMOI ETOTU 2

Su Contu de Cixireddu.

Nci fiant una borta duus sposus chi boliant tenni unu fillu.

Ònnia dii, sa fèmina pregaiat a Gesugristu po tenni sa gràtzia de unu pipiu.

Una dii iat tzacau s'enna de domu sua unu para e issa dd'iat contau de su disìgiu suu mannu. Su para dd'iat nau de pigai una pingiada manna, de dda ponni asuba de su fogu cun una farrancada de cixiri e de ndi tirai su covecu candu s'acua iat inghitzau a buddiri.

Sa fèmina iat postu in menti a su para ma candu iat abertu su covecu de sa pingiada ndi fiat bessiu unu muntoni de cixiri chi parriant pipius e tzerriant: "mamma, tèngiu fàmini! Mamma, bollu un'arroggu de pani!". Sa fèmina, disisperada, iat pigau sa scòvua e nc'iat bogau a foras cussu cixiri famiu.

Candu fiat torrau su pobiddu, sa fèmina dd'iat contau totu, ma issu non nc'iat crètiu. Totuinduna de un'àngulu ndi fiat bessiu unu pipiu pitu comenti unu cixiri chi tzerriat: "Mamma, tèngiu fàmini!"

Apustis su primu momentu de spantu mannu, iant detzìdiu impari de pesai cussu pipiu e dd'iant donau su nòmini de Cixireddu.

Ònnia dii Cixireddu andaiat a su sartu a portai su pràngiu a su babbu, e su babbu ddi naraiait sèmpiri de non trigai ca ingunis acanta iant biu un'orcu.

Unu meri Cixireddu iat atobiau un'orcu chi dd'iat aciapau e si fiat postu a tzerriai: "Imou ti papu!" E Cixireddu iat arrespostu: "nooo, po praxeri, lassa-mì sonai su sulitu ancora unu pagheddu, po s'ùrtima borta!"

S'orcu si dd'iat permìtiu, e Cixireddu iat inghitzau a sonai aici beni chi s'orcu dd'iat domandau cali fiat su segretu po sonai aici.

Cixireddu dd'iaiat arrespostu chi cun cussas manus mannas mannas non nc'iat a essi mai arrennèsciu a sonai aici.

"E ita depu fai po tenni is manus comenti is tuas?"

E Cixireddu: "piga su cavonatzu, sperra su truncu de cussa mata e apustis stichi-nci is manus: as a biri chi is didus tuus s'ant a fai prus piticus".

S'orcu iat postu in menti, iat sperrau su truncu cun unu corpu de cavonatzu, nc'iat postu aintru is manus e iat domandau a Cixireddu de ndi tirai su cavonatzu po ddu torrai a serrai.

S'orcu fiat abarrau cravau inguinis: si fiat acatau tropu a tardu chi Cixireddu dd'iat befau.